

鹽法

禹制青州之貢周有鹽人之掌此鹽政所由始也
嗣是籌國計者或與魚竝權其利或與鐵兼置之
官或招商開中入粟以寔塞下或因時變易輸以
赴鹺司其法互異我

朝於出鹽最盛之處設鹽院總理共事各省又置鹽
法道視地大小與其人民商旅之多寡以定鹽引
之數使其不濫不滯而商民兩便法莫善於此也
綏地山險而水激舟運維艱是以商人不至而地

方食鹽皆市井小販從洪江搬移入境則每年行
銷蓋亦有限矣

州志載靖州額鹽六百四十引綏會通三縣各三
百二十引每引改子鹽四十二包每包重八觔四
兩按照部定貴賤二價併有梁鹽安鹽之分奉
文飭照貴價運至漢口梁鹽賣庫平紱銀一錢四
分七厘安鹽每包減二厘每引納稅銀二分州及
三縣共該稅銀三十二兩商人交納解司轉解州
縣不與事每年奏銷與錢糧相同其分數在兩淮

飭定緣靖州三縣山河險阻裝運艱難是以本商
不至小販等從漢口經辰州鹽關至洪江洪江爲
一州三縣之總滙每屆但憑水程稽查按數報銷
而已 本呂州志

綏甯額鹽三百二十引嘉慶十一年奉 文增五
十引共三百七十引仍舊志

茶法

綏地本非茶鄉民之勤樹藝者問於園內隙地及山脚肥饒之處培種茶樹然所出無幾多者僅供一家之用少者尙須別買他處餘則全資買濟故歷來未有採辦亦未嘗設官經理云

錢法

綏無大商來境市易民間買賣向來俱係用銀嗣後兼用制錢或七百文或八百文准作一兩錢多從洪江市兌運入境不許攬和私錢故無私鑄私

販之案現在紋銀洪平一兩換制錢一千六七百文然亦隨時低昂無一定之價也

木政

環綏皆山所產多樅木雜樹供城鄉薪樵之資間有杉木出境並非木商來買俱係地販採伐扛運入河其發賣之處一由高沙市經寶慶關至益陽一由洪江經辰州關至河澣二處俱有綏甯碼頭及舊牙行本處歷無閔隘俱于寶辰兩關納稅焉

權政

立閔權稅都會有之綏邑僻壤凡牲畜布疋等物
隨地交易並無集場取稅固不同他處之必由衙
門登號然後可以買賣也

礦廠

禹貢荊州之域惟金三品綏邑並無出產金銀鉛
錫惟有半里耙冲地方產有銅礦因坐落苗民開
採有碍廬墓田坵歷來封禁又有夏二青坡等里

間出鐵礦亦奉 文禁止不許私開歲出示曉諭
並飭該里保正具結在案所以靖紛擾安民意至
深遠也

按此處礦廠於乾隆十七年內經知縣程際泰
詳查奉院批照舊封禁載舊志惠政乾隆四十
三年有商民顧學等呈請開採綏地麻隆岩銅
礦奉藩憲陳批仰該縣確勘詳報經知縣王楚
士查勘麻隆岩卽在耙冲山將歷奉封禁原委
於四十四年詳稟藩憲陳道憲王署靖州荆各

批飭永行封禁

綏甯縣志

卷之二十六
礦廠

五